



## 7. Tschanteda dal cussagl cumünel in marculli, ils 9.4.2014 a las 19.00 in chesa cumünela S-chanf

**Presidi:** Duri Campell

**Preschaints:** Gian Andrea Bott, Paolo Bernasconi, Jnes Barblan, Liun Quadri

**Absaints:**

**Actuar:** Duri Schwenninger

---

### Tractandas:

1. Protocol
2. 0.211 Dumandas da fabrica
3. 1.200 Circul Engiadin'Ota, piglier pusiziu reguard provedimaint futur da sandet
4. 1.300 Revisa totela uorden da l'inventar da la cuntredgia e monumaints natürels (VBLN) scu eir la descripziun d'ogets, piglier pusiziu
5. 7.100 Schlargiamaint da l'infrastructura Chauntaluf/Foura Chagnöls, surdeda da lavuors
6. 7.100 Schlargiamaint da l'infrastructura Chauntaluf/Foura Chagnöls, decisiun reguard cuosts attachs dadour la zona da fabrica in Grischuns
7. 0.110 Revisa totela dals tschantamaints
8. 7.900 Zona da deponia Bos-chetta Plauna, revisa parciela
9. 9.999 Varia

La glista da tractandas vain approveda sainza objecziuns.

**Protocol:** Il protocol da la tschanteda dals 19.03.2014 vain approvo unanimamaing.

### **45 0.211 Dumanda da fabrica Bernasconi Caroline e Paolo, dumanda da fabrica zievatiers**

La cumischiun da fabrica vaiva constatto, cha'ls patruns da fabrica vaivan eret ün mür sainza permiss. In seguit s'ho pussibilito als patruns da fabrica da piglier pusiziu in merit e d'inoltrer üna dumanda da fabrica zievatiers. La dumanda da fabrica zievatiers es gnida inoltrada a l'uffizi per il svilup dal territori Gischun per l'approvaziun. Il permiss da l'uffizi chantunel es uossa avauntmaun e'l cussagl decida cun 4 cunter 0 vuschs da conceder il permiss da fabrica zievatiers. Impü decida il cussagl cun 3 cunter 1 vusch da multer il surpassamaint da la ledscha da fabrica solidaricamaing cun fr. 1'000.00 als patruns da

fabrica scu eir fr. 1'000.00 a l'architect. Paolo Bernasconi s'ho absanto per quista tractanda.

**46 0.211 Dumanda da fabrica  
Sutter Manuela e Daniel, novas lobjias vi da las fatschedas vers  
mezzanot e vers mezdi**

Il cussagl piglia cugnuschentscha da la dumanda da fabrica da Manuela e Daniel Sutter per eriger lobjias vi da las fatschedas vers mezzanot e vers mezdi sün parcella nr. 777 in Somvih e decida unanimamaing da conceder il permiss da fabrica giavüscho.

**47 1.200 Uffizis circuitel e districtuel  
Circul Engiadin'Ota, piglier pusizium regard provedimaint futur  
da sandet**

Causa il resultat da la votumaziun dals 9 favrer 2014 regard la chesa da fliamaint ho la cumischium da l'ospidel, dmura d'attempo e fliamaint gieu üna tschanteda extraordinaria. In quella ho la cumischium decis da pussibilter a las vschinaunchas da piglier pusizium regard il provedimaint futur da sandet, aunz cu invier novas imsüras da planisaziun . Il cussagl decida uananimamaing da piglier seguantamaing pusizium sün las dumandas fattas:

*Dessan las vschinaunchas eriger insembel üna chesa da fliamaint?*

In prüma lingia es da tschercher investuors privats chi fabrican üna chesa da fliamaint. Scha'l success da chatter quels investuors nun es avauntmaun, dessan las vschinaunchas eriger insembel üna chesa da fliamaint cun ün lö centre, ma eir cun lös cun abitaziun per attempo decentrel, scu eir ün'administraziun centre.

*Scha schi, quants lets da chüra staun ster a disposiziun per nossa vschinauncha?*

Resguardand la media dals ultims 5 ans, cun 5 persunas per an, bastaro per S-chanf in avegnir maximel 8 fin 10 lets.

*Dess esser la spüerta da fliamaint centre u decentrel?*

In mincha cas es da prevzair ün center da sandet cun lös decentrel, cun ün'administraziun centre. Que vuol dir, cha las immobiglias da chüra dessan esser decentrelas, l'administraziun e gestiun centre.

*Voulan las vschinaunchas spordscher in futur eir abitaziuns per attempo?*

Abitaziuns per attempo sun gia avauntmaun in püssas vschinaunchas. Eir in nossa vschinauncha es avauntmaun l'intent d'eriger abitaziuns per attempo illa chesa Pravenda. Il permiss da fabrica es avauntmaun e las lavuors pels müdamaints da fabrica vegnan cumanzedas prosmamaing. Cun que füs da trer a nüz las abitaziuns existentas scu eir da prevzair d'eriger novas, scha que vain insomma dumando.

*Dessan in avegnir surpiglier perteders privats u per part privats il provedimaint da sandet in nossa regiun?*

Scha pussibel füs da tschercher üna soluziun sün basa privata.

*Do que in las vschinaunchas in Engiadin'Ota lös adattos per eriger il center da sandet cun tuot ils servezzans inua cha quel füs pussibel u giavüscho?*

A S-chanf nu do que pel mumaint ün lö adatto per eriger il center da sandet cun tuot ils servezzans. Ma scu gia manzuno, ün lö decentrel per abitaziuns d'attempo illa chesa Pravenda füs in mincha cas avauntmaun a S-chanf.

**48 1.300 Instanzas chantunelas e federelas**  
**Revaisa totela uorden per l'inventar da la cuntredgia e monumaints natürels (VBLN) scu eir la descripziun d'ogets, piglier pusiziun**

Il departamaint federal da l'ambient, transports, energia e comunicaziun (UVEK) ho suottamiss a la Regenza Grischuna ün sböz da la revaisa totela da l'uorden per l'inventar da la cuntredgia e monumaints natürels (BLN) scu eir la descripziun d'ogets per piglier pusiziun. Siand cha'ls monumaints natürels as rechattan süls territoris cumünels, pussibiltescha la Regenza Grischuna da piglier pusiziun a las vschinaunchas in merit. Sün noss territori ho la natüra intuorn l'imposant Piz Kesch / Piz d'Ees-cha cun la val Funtauna e la val Sertig, l'uschedit territori Kesch-Ducan, grand'importanza. Quella cuntredgia es markeda cun vals da muntagna chi cuorran liber scu eir ils numerus lejs glaziels e da morenas. Impü dal God Flin fin e cul territori dal Parc Naziunel. Il cussagl fo üna lectüra da las actas e decida unanimamaing da propuoner da na piglier aint las cuntregdias previssas sün nos territori cumünel i'l inventar, siand cha que blockess in futur differents progets, scu il militer, agricultura, turissem ed energia.

**49 7.100 Chanalisaziun/sarinera**  
**Schlargiamaint da l'infrastructura Chauntaluf/Foura Chagnöls, surdeda da lavuors**

Resguardand il post i'l preventiv 2014 e la deliberaziun dal credit da la radunanza cumünela dals 02.04.2014 surdo il cussagl unanimamaing las seguintas lavuors in connex cul schlargiamaint dals indrizzs per l'allontanamaint da l'ova persa e pel provedimaint da l'ova potabla in Chauntaluf/Foura Chagnöls: las lavuors d'impressari a la firma Angelini SA, S-chanf per l'import da fr. 825'853.65; las lavuors da sanitari a la firma Pinggera SA, S-chanf per l'import da fr. 204'635.15 e las lavuors da cuvrida a la cumünaunza da lavur Christoffel SA/Kibag SA, San Murezzan per l'import da fr. 484'640.00. Tar la surdeda s'ho resguardo las offertas las pü favuraivlas.

**50 7.100 Chanalisaziun/sarinera**  
**Schlargiamaint da l'infrastructura Chauntaluf/Foura Chagnöls, decisiun regard cuosts attachs dadour la zona da fabrica in Grischuns**

In connex cul schlargiamaint da l'infrastructura in Foura Chagnöls es previs d'eriger ün attach dadour la zona da fabrica per las chesas in Grischuns. Tenor ledscha superiura ho la vschinauncha da metter a disposiziun l'infrastructura illas zonas da fabrica, ma na dadour quellas. Il cussagl decida unanimamaing da fer la lavur quist an, pero da metter in quint ils cuosts plainamaing als possessuors da las chesas chi sun dadour la zona da fabrica.

**51 0.110 Legislativa**  
**Revaisa totela dals tschantamaints**

Differentas revaisas d'uordens sun gnidas fattas i'ls ans passos e differentas ledschas ed uordens superiors sun gniefs revais, perque es uossa raggiunt il temp da fer üna revaisa totela dals tschantamaints da la vschinauncha da S-chanf. Il cussagl decida da propuoner a la prosma radunanza da tscherner üna cumischiun cun 5 commembers chi prepara la revaisa totela a maun da la radunanza cumünela.

**52 7.900 Planisaziun dal territori cumünel**  
**Zona da deponia Bos-chetta Plauna, revaisa parciela**

Las actas da la revaisa parciela da la zona da deponia Bos-chetta Plauna sun gnidas adattedas tenor il rapport da la precontrolla da l'uffizi chantunel. L'ultima radunanza ho tschernieu üna cumischiun chi fo las trattativas culs proprietaris privats da terrain. Cun que es uossa raggiunt il temp per invier la procedura da cooperaziun. Quella procedura

dess gnir invieda cun üna radunanza d'orientaziun. Il cussagl fo üna lectüra da las actas e decida d'invier la procedura da cooperaziun fand ils 30 avrigl 2014 üna radunanza d'orientaziun cun las actas preschaintas.

**53 9.999 Varia**

Il cussagl piglia cugnuschentscha da la resposta da la Viafier retica regard ils trens directs chi nu ferman pü a Cinuos-chel. Ils respunsabels inclegian la situaziun ma nu paun metter invista da müder la situaziun, siand cha las crusedas dals trens sun planisedas cun poch temp e poch löschs sül traject Samedan – Sagliains.

Il president infurmescha, cha'l seguond rasgader Christian Platzer ho desdit la piazza tar nossa vschinauncha. La piazza libra vain prosmamaing publisheda.

A las 22.55 vain la tschanteda alveda.

In buna fè

L'actuar:

***D. Schwenninger***